



Asa S. Hendry guadagna il premi grischun da litteratura.

FOTO THEO GSTÖHL,
DIS DA LITTERATURA 2018

In premi cun signal

Il Premi grischun da litteratura va ad Asa S. Hendry, Ursina Trautmann e Luca Maurizio

ANDREAS CADONAU/FMR

■ **La Fundaziun premi grischun da litteratura ha surdà il premi 2021 per la 23avla giada e probablmain er per la davosa giada. La distincziun surdada ad Asa S. Hendry, Ursina Trautmann e Luca Maurizio vala era sco signal e recumandaziun da cuntinuar.** «Ina bella surpraisa». L'autura *Asa S. Hendry* ha retschavì il Premi grischun da litteratura 2021 da cuminanza cun l'autura e schurnalista *Ursina Trautmann* e *Luca Maurizio*, chantatur e cabarettist. Tant pli gronda po la surpraisa esser stada per l'autura rumantscha che ha tradì da betg avair savì ch'i dettia insumma in tal premi. Tant per reconuschientscha sco per motivaziun valitescha la giuvna autura rumantscha la distincziun surdada per ses roman «Sin lautget». In roman fitg remartgabel che tracta da maniera poetica e cun gronda sensibilidat ed intelligenza

tematicas fitg sensibilas ed actualas, sco quai che la Fundaziun premi grischun da litteratura scriva en sia comunicaziun. Asa S. Hendry viva da preschent a Berna nua ch'ella studegia scienza da teater sper il studi da gender a Basilea. Il sustegn finanziel è medemamain bainvesì sco studenta e durant il temp nua che las ulteriuras activitads culturalas èn franadas. A lavur en e per la cultura vegn Asa S. Hendry vinavant, sco ella ha tradì, e quai dasper il studi. Dentant na sa fatschenta ella betg cun in nov roman. «Il teater stat a mi actualmain pli datiers.» Cuntinuar cun projects da teater vul l'autura era sche las restricziuns actualas han franà bleras activitads. Tuttina ha Asa S. Hendry pudì relatar da provas da teater per ina preschentaziun prevista a Cuira.

Tranter dramaturgia e schurnalissem Ursina Trautmann è vegnida resguardada da la fundaziun per sia activitad litte-

rara multifara ed engaschada. Ina activitad che sa manifestescha tranter auter era sin la tribuna. L'autura è stada engaschada sco schurnalista per diversas gasettas svizras e ha lavurà sco correspundenta per la Svizra romanda per l'Agentura da novitads svizra. Ella che sa definescha sezza sco autura libra viva cun sias filias en il chantun Grischun. Qua tradeschan ils fastiz da Ursina Trautmann ina varietad creativa sco autura che surpasa current ils cunfins tranter schurnalissem e litteratura. Renconuschì cun il premi litterar ha la fundaziun anc il chantatur e cabarettist, Luca Maurizio, actualmain da chasa cun sia famiglia en Tumleasta.

Tranter las culturas

Creschì si e Luca Maurizio a Malögia, tranter las culturas e linguas talian, tudestg e rumantsch. La lingua bregagliotta, sia lingua materna, è per el bunmain pli datiers al rumantsch che al

talian. Cun ses program sco cabarettist e chantatur sa mova Luca Maurizio tant en il spazi cultural tudestg sco talian. El ha tradì che l'umor talian e tudestg sa differenzieschia. «Ils Tudestgs vulan tadlar sgnoccas dals Talians ed ils Talians sgnoccas dals Tudestgs.» Il chantatur e cabarettist ha explitgà da betg vulair divertir sulet il publicum cun sgnoccas. Ses program sa deditgeschia a tematicas contemporanas ch'el veglia intermediar al publicum a moda divertenta. Che corona na levgescha mumentan betg la vita culturala e ses program da preschentaziun n'ha Luca Maurizio insumma betg vulì contestar. Tant pli intgantà è el dal Premi litterar grischun. La Fundaziun premi grischun da litteratura ha undrà Luca Maurizio per il tun poetic da sias chanzuns e per la satira lucida sur da la societad che s'exprima en sias preschentaziuns divertentas e mudentas.